

#আমি পদ্মজা পর্ব ৫৩

কোনো সাড়া নেই। পদ্মজা পিছনে ফিরে
তাকাল। লিখন একদৃষ্টে তাকিয়ে আছে।
অন্ধকারে তার দিকে চেয়ে কী দেখছে! পদ্মজা
আবার মুখ ঘুরিয়ে নিল। কাটা কাটা গলায়
বলল, 'কিছু বলার যখন নেই, আসি আমি।'
'ভুলে গেছো আমায়? মনে পড়ে না?' লিখনের
কণ্ঠে ব্যাকুলতা।

পদ্মজার তীক্ষ্ণ বাক্যবাণ, 'না ভুলবার মতো
কোনো সম্পর্ক কী আমাদের ছিল? ছিল না।
আর এভাবে নির্জনে কথা বলা ঠিক হচ্ছে না।
আপনি বুঝদার মানুষ, জ্ঞানী মানুষ। এতটুকু
নিশ্চয়ই বুঝবেন।'

লিখন স্তান হেসে বলল, 'আচ্ছা, আজ আসো।'
'একটা অনুরোধ ছিল।'
'কী?'

পদ্মজা ফের আবার তাকাল। সরাসরি লিখনের
চোখের দিকে। সঙ্গে সঙ্গে লিখনের বুক কেঁপে
উঠে। সে অপলক চোখে তাকিয়ে থাকে।

পদ্মজা বলল, 'নিজেকে এবার গুছিয়ে নিন।
মরীচিকার পিছনে অনেক দৌড়েছেন, আর না।
এবার নিজের জীবনটা নতুন করে সাজান।
আপনার মনের জোর বাড়ান। মানুষ দ্বিতীয়
প্রেমেও পড়ে। দ্বিতীয় বার কাউকে
ভালোবাসে। মনপ্রাণ উজাড় করে ভালোবাসে।
আপনি চেষ্টা করুন। আপনিও পারবেন। কেউ
না কেউ আপনার জন্য অবশ্যই আছে।'

'পদ্ম ফুল।'

পদ্মজা একটু সময়ের জন্য হলেও থমকায়।
লিখন বলল, 'এভাবেই ভালো আছি আমি।
তুমিও এভাবেই সারাজীবন ভালো থেকো।'

পদ্মজা কী প্রতিক্রিয়া দিবে বুঝে উঠতে পারছে
না। এই লিখন শাহ তো এক ধ্যানেই পড়ে

আছে। সে আর কথা বাড়াল না। যে বুঝেও
বুঝতে চায় না,তাকে বুঝিয়ে লাভ নেই। সে দুই
পা পিছিয়ে গিয়ে বলল,'শুভ রাত্রি।'

লিখন পদ্মজার যাওয়ার পানে তাকিয়ে থাকে।
তার অশ্রুসজল চাহনি। তবে বুকে প্রশান্তি।
জীবনের খরতাপ দহনে মায়াময় পদ্মজার
কণ্ঠ,একটু দেওয়া সময় তার বুকে প্রশান্তির
টেউ তুলেছে। এই...এইটুকু সময়ের স্মৃতি
নিয়েই কয়েকটা রাত আরামে ঘুমানো যাবে।
সে বিড়বিড় করল,'আমি মানতে পারি না তুমি
অন্য কারো। আমি তোমাকে ভালোবাসি।'
শেষের শব্দ তিনটে ঘোর লাগা কণ্ঠে ভেঙে
ভেঙে বলল।

পূর্ণাকে ঘরে এনে পদ্মজা ধমকে বলল,'এই
ঠান্ডার মধ্যে সোয়েটার না পরে কীভাবে
থাকিস? বাইরে বাতাসও হচ্ছে। আমার কোনো
কথাবার্তাই কী শুনবি না?'

পূর্ণা অপরাধী স্বরে বলল, 'আর হবে না আপা।
আগামীকাল সন্ধ্যার আযানের সাথে সাথে ঘরে
চলে আসব।'

'জি, না। বিকেল থেকেই ঘরে থাকবেন।
এমনিতেই এই বাড়ির অবস্থা ভালো না। তুই দুই
দিন পর বাড়িতে চলে যাবি।'

'তুমি যাবে না?'

পদ্মজা আনমনে কিছু ভাবল। তারপর
বলল, 'যাব। কয়দিন পর। আচ্ছা, শোন রাতে
টয়লেটে যেতে ভয় পেলে আমাকে ডাকবি।
চেপে রাখবি না।'

'আচ্ছা।'

পূর্ণা খুক খুক করে কাশতে থাকল। পদ্মজা
বিচলিত হয়ে বলল, 'কাশিও হয়ে গেছে! কত
ঠান্ডা বাঁধিয়েছিস। জ্বরও আছে নাকি দেখি।'

পদ্মজা পূর্ণার কপাল ছুঁয়ে তাপমাত্রা অনুমান
করে বলল, 'আছেই তো। তুই কী নিজের যত্ন

নেয়া শিখবি না? সারাদিন নতুন শাড়ি পরে,
সাজগোজ করে ঘুরে বেড়ালেই নিজের যত্ন
নেয়া হয়ে যায়? স্বাস্থ্যের যত্ন নিতে হবে তো।’
পূর্ণা বাধ্য মেয়ের মতো বলল, ‘আচ্ছা, নেব।’
‘তা তো সবসময় বলিস। তুই বস, আমি কুসুম
গরম পানি নিয়ে আসছি। গড়গড়া কুলি করে
এরপর ঘুমাবি।’

‘আপা-

‘তুই চুপ থাক। চুপচাপ লেপের ভেতর শুয়ে
থাক। আমি আসছি।’

পদ্মজা রান্নাঘরে এসে দেখে বালতিতে পানি
নেই। বাড়ির সবাই যার যার ঘরে আছে। হয়তো
ঘুমিয়েও গেছে। আমার তো সেই কখন
ঘুমিয়েছে। পদ্মজা ছোট বালতি হাতে নিয়ে
কলপাড়ে আসে। চারিদিক নির্জন, থমথমে।
কোনো সাড়াশব্দ নেই। পদ্মজা আশেপাশে
চোখ ঘুরিয়ে নিল। ঝাপসা আলোয় পুরো

বাড়িটাকে রহস্যময় মনে হচ্ছে। যদিও এই বাড়িতে সবসময়ই রহস্য বিদ্যমান! পদ্মজা বালতি রেখে, কল চাপতে যাবে তখনই কানে একটা ঝনঝন শব্দ আসে। স্টিলের কিছু কাছে কোথাও পড়েছে। পদ্মজা থমকে দাঁড়াল। কান খাড়া করে বুঝতে পারল শব্দটা রানির ঘর থেকে আসছে। রানি আপনার কোনো বিপদ হলো না তো? পদ্মজা ছুটে আসে রানির ঘরের সামনে। কানে ক্রোধ মেশানো চাপা কণ্ঠ ভেসে আসে, 'তোমার লগে কয়বার হুতছি বইললা ভাইবো না সবসময় হুইতে দিয়াম। মাডিতে যেভাবে এতদিন ছিলা, আজও থাকবা। বিছানাত উঠার জন্য গাঁইগুঁই করবা না।'

'মাডিত অনেক ঠান্ডা লাগে। আমারে এক কোণাত জায়গা দেও।'

'তুমি মাডিত থাকবা মানে মাডিত থাকবা। কামলা হইয়া মালিকের ছেড়ির লগে হুইবার সাহস আর করবা না।'

‘আমি বিছানাত ঘুমাইয়াম। তুমি আমার বউ
লাগো।’

‘তুমি মাড়িত ঘুমাইবা। আমি তোমারে জামাই
মানি না।’

‘দেহো রানি-

এরপরই একটা আর্তচিৎকার ভেসে আসে।
রানি-মদন তর্ক করছে। নিশ্চয় রানি মদনকে
ধাক্কা দিয়েছে। আর মদন ব্যথা পেয়েছে।

পদ্মজা একবার ভাবল, দরজায় কড়া নাড়বে।
এরপর ভাবল, স্বামী-স্ত্রীর অনেক কথা সে শুনে
ফেলেছে। আর না শোনাই ভালো। যেহেতু তারা
কারো সামনে ঝগড়া করে না, রাতে নিজ ঘরে
সবার অগোচরে ঝগড়া করে। তাহলে ব্যপারটা
ব্যক্তিগত। পদ্মজা সরে আসে। তবে মনটা খুব
খারাপ হয়ে যায়। এই দাম্পত্য সংসারে কী
ভালোবাসা, সুখ আসবে না? মদন তো দেখতে
খারাপ না। শুধু এতিম আর এই বাড়ির একজন

বাধ্য ভৃত্য। এ ছাড়া তো ভীষণ সহজ-সরল।
সবার সাথে হেসেখেলে কথা বলে। ঠোঁটে হাসি
সবসময় থাকে।

লিখন, মৃদুল একই ঘরে একই বিছানায়
শুয়েছে। লিখনের জন্য আলাদা ঘর ছিল। কিন্তু
সে মৃদুলের সাথেই শুয়েছে। ছেলেটাকে খুব
ভালো লেগেছে তার। সোজাসুজি কথা বলে।
মনে কিছু চেপে রাখতে পারে না। এতক্ষণ
বকবক করেছে। সবেমাত্র অন্যপাশে ফিরে
চোখ বুজেছে। বোধহয় ঘুম পেয়েছে। লিখনের
মনটা আনচান আনচান করছে। ইচ্ছে
হচ্ছে, পদ্মজাকে দেখতে। একসাথে বসে গল্প
করতে। কিন্তু এ তো সম্ভব নয়। এই বাড়িতে
আর আসা যাবে না। পদ্মজার সামনে এলেই
মন বেপরোয়া হয়ে যায়। কত-শত ইচ্ছে জেগে
উঠে। লিখনের ব্যক্তিত্ব ভীষণ শক্ত। শুধু এই
একটা জায়গাতেই সে দুর্বল। এভাবে চলতে

পারে না। নিজের জায়গায় নিজেকে শক্ত
থাকতে হবে। লিখন জোরে নিঃশ্বাস ছাড়ল।
মৃদুল ফিরে তাকাল। বলল, 'ভাইয়ের ঘুম
পাইতাছে না?'

'হু। তুমি ঘুমাও।'

মৃদুল মেরুদণ্ড সোজা করে শুয়ে
বলল, 'আপনি –

'আপনি না তুমি। একটু আগেই না আমাদের
কথা হলো। তুমি আমাকে তুমি বলবে।'

মৃদুল হাসল। বলল, 'তুমি যে মেয়েটার জন্য
অপেক্ষা করছো, সে মেয়েটা পদ্মজা ভাবি। তাই
না?'

লিখন অপ্রস্তুত হয়ে উঠল। পদ্মজা যে বাড়ির
বউ সে বাড়ির আত্মীয়র সাথে এসব নিয়ে কথা
বলাটা নিশ্চয় অনুচিত! এতে পদ্মজার
অসম্মান হবে। সে তো চায় না, পদ্মজা কষ্ট
পাক। তাকে নিয়ে কেউ দুই লাইন বেশি

ভাবুক। পদ্মজা সবসময় ভালো থাকুক। লিখন
জোরপূর্বক হাসল। তারপর বলল, 'কী বলছো!
তেমন কিছুই না। ঘুমাও এখন। আমারও
অনেক ঘুম পাচ্ছে।'

লিখন অন্যদিকে ঘুরে শুয়ে পড়ে। মৃদুল হতাশ
হয়ে চোখ বুজে।

পদ্মজা অন্ধকারে ধীরে ধীরে হাঁটছে। হাতে
কাঁচের গ্লাস। তাতে কুসুম গরম পানি। সিঁড়িতে
পা রাখতেই কারো পায়ের আওয়াজ কানে
আসে। পদ্মজা ঘাড় ঘুরিয়ে দেখে, আলমগীর
চোরের মতো চারপাশ দেখে দেখে সদর
দরজার দিকে যাচ্ছে। পদ্মজা দ্রুত সিঁড়ি থেকে
নেমে চেয়ারের পিছনে লুকিয়ে পড়ে। গ্লাস
রেখে দেয় এক পাশে। তার স্নায়ু উত্তেজিত হয়ে
পড়েছে। চোখ দুটি তীক্ষ্ণ হয়ে আলমগীরকে
পরখ করছে। আলমগীরের পরনে পাঞ্জাবি।
বাড়িতে ভদ্রলোকের উপস্থিতি টের পাওয়া যায়

না। শান্তশিষ্ট,চুপচাপ। মাঝেমাঝে ঢাকা যায়।
দেখা হয়,তবে কথা হয় না। কিছু প্রশ্ন করলে
উত্তর দেয়। নিজ ইচ্ছায় কথা বলে না।
আলমগীর সদর দরজা পেরিয়ে যায়। পদ্মজা
সাবধানে আলমগীরের পিছু নেয়। পায়ের
জুতাগুলো হাঁটার তালে মৃদু শব্দ তুলছে। তাই
পদ্মজা জুতাজোড়া খুলে দরজার পাশে রেখে
দিল। আলমগীর অন্তরমহলের ডান দিকে
এগোচ্ছে। ঝাঁঝি পোকাকার ডাক চারিদিকে। দূরে
কোথাও শেয়াল ডাকছে। গা ছমছমে পরিবেশ।
এদিকওদিক কোনো মৃদু শব্দ হতেই পদ্মজা
উৎকর্ণ হয়ে উঠছে। কেমন গা কাটা দিচ্ছে।
এতো রাতে দীর্ঘদেহী এই লোক যাচ্ছে কোথায়?
হাঁটতে হাঁটতে তারা বাড়ির পিছনে চলে আসে।
আলমগীর অন্তরমহলের পিছনে গিয়ে দাঁড়াল।
মনে হচ্ছে এটাই তার গন্তব্য। পদ্মজা
কলাগাছের পিছনে লুকিয়ে পড়ে। বাতাসে গা
কাঁপুনি দিচ্ছে। আলমগীর টর্চ জ্বালিয়ে

চারপাশ দেখে নিল। তারপর মুখ দিয়ে একটা
অদ্ভুত আওয়াজ করল। মনে হচ্ছে, কাউকে
ইঙ্গিত দিচ্ছে। পদ্মজার রগে রগে দামামা শুরু
হয়। কী হতে চলেছে? আজ সে কী দেখবে?

পূর্ণা বিরক্ত হয়ে শোয়া থেকে উঠে বসে।

এতক্ষণ হয়ে গেল তার আপা আসছে না কেন?
সে জুতা পরে বেরিয়ে আসে। নেমে আসে নিচ
তলায়। রান্নাঘরে যাওয়ার পথে পায়ে কাঁচের
গ্লাস লেগে পড়ে যায়। পূর্ণা ভয় পেয়ে যায়।
এখানে গ্লাস কে রাখল! আংশিক পানি তার
পায়ে লাগে। মনে হচ্ছে, পানিটা গরম। এই
রাতের বেলা গরম পানি এখানে... কীভাবে? পূর্ণা
ভাবে, তার আপার পানি গরম করার কথা ছিল।
কিন্তু গরম করে এখানে কেন রাখবে? ঘরে তার
কাছে নিয়ে যাওয়ার কথা ছিল। পূর্ণা রান্নাঘরে
এসে দেখে পদ্মজা নেই। সে আতঙ্কিত হয়ে
পড়ে। দরজার পাশে পদ্মজার জুতা দেখে

ভয়টা আরো বেড়ে যায়। সে দৌড়ে আমিরের
ঘরে গেল। গিয়ে দেখল, আমির ঘুমাচ্ছে।
পদ্মজা নেই। পূর্ণা এবার ঘামতে থাকল। সে
শুনেছে, এই বাড়িতে ভূত-জ্বীন আছে। এরা
মানুষের ক্ষতি করে। বিশেষ করে সুন্দর
মানুষদের। তার মানে তার আপার গুরুতর
বিপদ! পূর্ণা এক দৌড়ে রান্নাঘরে আসে। লণ্ঠন
জ্বালিয়ে নেয়। অন্যসময় হলে ভয় কাজ
করত। আজ করছে না। সে তার আপাকে জান
দিয়ে হলেও বাঁচাবে। মনে হয়, কোনো শয়তান
জ্বীন তার বোনকে ধরেছে এবং পুকুরপাড়ে
নিয়ে গেছে। পূর্ণা ঝটপট বেরিয়ে পড়ে।
কাউকে ডাকার বুদ্ধি অবধি মাথায় আসেনি।
সে আতঙ্কে হিতাহিত জ্ঞানশূন্য হয়ে পড়েছে।
আয়তুল কুরসি পড়তে পড়তে পুকুরপাড়ের
পথ ধরে।

পদ্মজাকে চমকে দিয়ে তৃতীয় তলার একটা জানালা হাট করে খুলে যায়। সেখান থেকে একটা মোটা দড়ি আলমগীরের উদ্দেশ্যে ছুঁড়ে দেওয়া হয়। পদ্মজার ওষ্ঠদ্বয় নিজেদের শক্তিতে আলাদা হয়ে যায়। দুই চোখ বড় বড় করে তাকিয়ে থাকে। আলমগীর সেই দড়ি বেয়ে তৃতীয় তলায় উঠে যায়। দড়ি বেয়ে উপরে উঠার দ্রুততা দেখে মনে হলো, এর আগে বহুবার আলমগীর দড়ি বেয়ে উপরে উঠেছে। পদ্মজার মস্তিষ্ক শূন্য হয়ে পড়ে। জানালা দিয়ে আলমগীর কার ঘরে গিয়েছে? তৃতীয় তলায় সে একবার গিয়েছে তাই জানেও না কোন ঘরে কী আছে। পায়ের গোড়ালিতে ঠান্ডা শিরশিরে অনুভব হচ্ছে। পদ্মজা এক হাত দিয়ে ছুঁতেই বুঝতে পারে জোঁকে ধরেছে। জোঁকে তার খুব ভয় আছে। কিন্তু এখন ভয় করছে না। এখন তার স্নায়ু উত্তেজিত হয়ে আছে অন্যকাজে। সে জোঁক ছাড়িয়ে নিল। অনেকক্ষণ পার হয়ে যায়

আলমগীরের দেখা নেই। দড়ি তো ঝুলছে।
মানে নামবে আবার। পদ্মজা কোমরে এক হাত
রেখে তাকিয়ে রইল। আচমকা মনে
পড়ে, তৃতীয় তলায় রুম্পা আছে। ডান দিকের
কোনো এক ঘরে। আর আলমগীর ডান দিকের
কোনো ঘরের জানালা দিয়েই ঢুকেছে। মানে
কী রুম্পার কাছে গিয়েছে? পদ্মজা বারংবার
শুধু চমকাচ্ছে। আলমগীর দড়ি বেয়ে নেমে
পড়ে। তারপর ইশারায় অন্য কাউকে নামতে
বলে। কাঙ্ক্ষিত সেই মুখটি দেখে পদ্মজার
পিল চমকে উঠে। রুম্পা! শাড়ির আঁচল
কোমরে গুঁজে দড়ি বেয়ে নামছে। বার বার
দড়ি থেকে হাত ছুটে যাচ্ছে। আলমগীর দুই
হাত বাড়িয়ে রেখেছেন যাতে রুম্পা পড়ে গেলে
তিনি ধরতে পারেন। পদ্মজার বুক দুরুদুরু
করছে, যদি রুম্পা পড়ে যায়! এতো ঝুঁকি কেন
নিয়েছে?

রুম্পার পা মাটিতে পড়তেই আলমগীর শক্ত
করে রুম্পাকে জড়িয়ে ধরে। রুম্পার কান্নার
সুর ভেসে আসে। তাৎক্ষণিক আলমগীর
রুম্পার মুখ চেপে ধরে কিছু বলল। তারপর
টর্চের আলো দিয়ে চারপাশ দেখে, রুম্পাকে
এক হাতে শক্ত করে ধরে হাঁটা শুরু করল।
তখন কোথেকে উদয় হয় একজন অদ্ভুত
লোকের। লোকটা কালো, মোটা, লম্বা চুল। এক
হাতে রাম দা, অন্য হাতে লাঠি। অজানা
বিপদের আশঙ্কা পেয়ে পদ্মজার ভয় হলো। পা
থেকে কিছুটা দূরে থাকা কয়েকটা পাথরের
মধ্যে বড়সড় দেখে একটা পাথর হাতে নিল।
যেন বিপদে কাজে লাগানো যায়। আলমগীর
আর অজ্ঞাত লোকটির মধ্যে তর্ক-বিতর্ক হয়।
একসময় তা হাতাহাতিতে চলে যায়। রুম্পা
ভয়ে জুবুথুবু হয়ে গেছে। অজ্ঞাত লোকটি
রুম্পাকে ধরতে চাইছে। কিন্তু আলমগীর তা
হতে দিচ্ছে না। পদ্মজার মনে হচ্ছে, এখন তার

সামনে যাওয়া উচিত। আল্লাহর নাম নিয়ে সে
কলাগাছের পেছন থেকে বেরিয়ে আসে।
আলমগীর অজ্ঞাত লোকটির হাত থেকে
রামদা নিয়ে দূরে ফেলে দিল। তখনই সে
পদ্মজাকে দেখতে পেল। চৈঁচিয়ে উঠে
বলল, 'বোন, সাহায্য করো।'

অজ্ঞাত লোকটি পদ্মজাকে দেখে আরো বেশি
হিংস্র হয়ে উঠল। সে ছুটে এসে ছোঁ মেরে
রুম্পাকে ধরতে চাইল। আলমগীর অজ্ঞাত
লোকটির ঘাড়ের ঝাঁপিয়ে পড়ে। দুই হাতে
ঝাপটে ধরে রেখে রুম্পাকে বলে, 'তুমি যাও
রুম্পা।'

রুম্পা দৌড়ে পদ্মজার কাছে আসে। সে
হাঁপড়ের মতো হাঁপাচ্ছে। ভয়ে ঘামছে।
আলমগীর অজ্ঞাত লোকটিকে আটকে রাখতে
পারছে না। সে অনেক কষ্টে অনুরোধ
করে, 'আমার রুম্পারে ওরা মেরে ফেলবে। তুমি

ওরে খালপাড়ে নিয়ে যাও বোন। আমি
আজীবন তোমার গোলাম হয়ে থাকব।’

পদ্মজা দুই হাতে আঁকড়ে ধরে রুম্পাকে।
আলমগীরের হাত থেকে পড়ে যাওয়া টর্চের
আলো অজ্ঞাত লোকটির মুখে পড়তেই
পদ্মজার খুব চেনা মনে হয়। আবার পারিজার
খুনির বর্ণনাও ঠিক এমনই। ভাবতেই, পদ্মজার
রক্ত ছলকে উঠে। সেই মুহূর্তে মরার উপর
খাঁড়ার ঘা হিসেবে আবির্ভাব ঘটে পূর্ণার। সে
পুকুরপাড়ে যাচ্ছিল। টর্চের আলো পেয়ে সে
এদিকে ছুটে এসেছে। অজ্ঞাত লোকটি রুম্পার
উদ্দেশ্যে হাতের লাঠি ছুঁড়ে মারে। পদ্মজা দ্রুত
রুম্পাকে নিয়ে সরে যায়। লাঠি গিয়ে সোজা
পূর্ণার কাঁধে পড়ে। সে আপা বলে আর্তনাদ
করে বসে পড়ে। পদ্মজা দিকদিশা হারিয়ে
ফেলে। কী করবে সে? মনে হচ্ছে রুম্পাকে
কেউ খুন করতে চাইছে তাই আলমগীর তাকে

নিয়ে পালাচ্ছে। আর এই নাম না জানা
লোক, রুম্পাকে আঘাত করতে চাইছে। আবার
পূর্ণাও আঘাত পেয়েছে। কী করবে পদ্মজা?
রুম্পাকে নিয়ে খালের দিকে যাবে? পূর্ণাকে এই
ভয়ংকর পরিবেশ থেকে নিরাপদে নিয়ে যাবে?
নাকি পারিজার খুনিকে ধরবে?
চলবে...